

Mid-Day Dogri News Bulletin,

24 May 2025 12:25 hrs.

India-UNSC

संयुक्त राष्ट्र सुरक्षा परिषद च भारत नै सख्त शब्दें च पाकिस्तान दी आलोचना कीती ऐ ते दशकें थमां बन्ने पारा दा कीते जा'रदे आतंकवादी हमलें गी उजागर कीता ऐ। संयुक्त राष्ट्र च भारत दे स्थाई प्रतिनिधि नै इक खुली बैहस च पाकिस्तान पर आरोप लाया जे उन्नै सिविल नागरिकें गी ढाल बनाइयै आतंकवादिणं दा बचाव कीता ते दुनिया नै दिक्खी लैता ऐ जे आपरेशन सिंदूर दौरान मारे गेदे आतंकवादिणं पाकिस्तानी फौज दे अधिकारिणं श्रद्धांजलि दिती ही। उन्नै पाकिस्तान आसेआ भारत दे सीमावर्ती इलाकें च सिविल लोकें गी निशाना बनाइयै कीते गेदे हमलें दी निंदा कीती ते 26/11 आहले मुम्बई आतंकी हमले ते 22 अप्रैल 2025 आहले पहलगाम आतंकवादी हमले च पाकिस्तान दी भूमिका गी उजागर कीता। उन्नै आखेआ जे आतंकवादिणं ते नागरिकें गी बराबर दस्सने आहले मुल्खै गी नागरिक सुरक्षा दी गल्ल करने दा कोई अधिकार नेई ऐ।

<><><><><><>

Rahul-Gandhi

लोकसभा च विपक्ष दे नेता ते कांग्रेस दे साबका प्रधान राहुल गांधी होर पाकिस्तानी गोलाबारी करी प्रभावित परौआरें कन्नै मिलने लेई अज्ज पुंछ दे दौरे पर आए देन। हुनै कोला किश चिर पैहले राहुल होर प्रभावित लोकें कन्नै मिले ते उंदे नै अपनी हमदर्दी प्रगट कीती। राहुल गोलीबारी प्रभावित इक्क स्कूल च बी गे, उत्थे विद्यार्थियें कन्नै गल्लबात कीती ते उन्दे जज्बे दी सराहना कीती जेडे इस खतरे दा मकाबला करने दे बावजूद अज्ज स्कूलै च पढाई करा करदे न। राहुल होरें बच्चें गी आखेआ जे तुसें खतरे ते डर आहला माहौल

दिक्खेआ ऐ पर चिंता नेई करनी, हालात परतियै पैहले आङर सामान्य होई जाङन, तुस मन लाइयै पढो-मते-मते दोस्त बनाओ। राहुल गांधी होर मेद ऐ जे दपैहरी मगरा दिल्ली परतोई जाङन।

<><><><><><>

Tiranga

जम्मू-कश्मीर हाई कोर्ट बार एसोसिएशन नै आपरेशन सिंदूर दी कामयाबी दा जश्न मनांदे होई इक तिरंगा रैली दा सरिस्ता कीता जेड़ी हाई कोर्ट परिसर थमां शुरू होई ते हाई कोर्ट चौक जानीपुर जाइयै सम्पन्न होई। बार एसोसिएशन दे प्रधान निर्मल कोतवाल हुंदी अगुवाई च इस तिरंगा रैली च सशस्त्र बलें लेई पूरा समर्थन दस्सेआ गेआ। वकीलें ते न्यायपालिका दे सदस्यें इस रैली च बधी-चढियै हिस्सा लैता ते पूरे जोश कन्नै राश्ट्री झंडा लेइयै देशभक्ति दे नारे बी लाए। जम्मू-कश्मीर हाई कोर्ट बार एसोसिएशन जम्मू दे प्रधान एडवोकेट निर्मल कोतवाल होरें आखेआ जे आपरेशन सिंदूर आतंकवाद दे खलाफ इक्क ऐसी सख्त कार्रवाई ऐ जिसी पाकिस्तान कदें नेई भुल्लग ते इस कामयाबी दा जश्न पूरा देश इकजुट होइयै मना करदा ऐ।

<><><><><><>

CS-IWT

मुख्य सचिव अटल डुल्लू होरें जम्मू-कश्मीर च झेलम, चिनाह ते रावी दरेआएं पर जल परिवहन यानि वाटर ट्रांसपोर्ट बवस्था IWT शुरू करने दिएं संभावनाएं दा पता लाने बारै इक बैठक सद्दी जेदे च इस पहल दे बक्ख-बक्ख पहलुएं पर विचार बटांदरा कीता गेआ। इस मौके उनें आखेआ जे इस सेवा दे शुरू करने कन्नै केई जिले आपूं च जलमार्गे राएं जुडङन, इक थाहरा दुई थाहर आओजाई सस्ती होग ते सब्भनें शा बड्डी गल्ल ऐ जे एहदे नै पर्यावरण पर कोई माझा असर नेई पौग। इस योजना तैहत बिजली कन्नै चलने आहलियें लौहकियें, फैरी आंगर दिएं किशियें दी बवस्था होग जेदे च इक टैमै च 20 सोआरियां बेही सकङन। अटल डुल्लू होरें

दूर-दूरेडे इलाकें तोड़ी दरयाएं राएं ट्रांसपोर्ट दी सुविधा उपलब्ध कराने ते सैलसफा गी बढ़ावा देने लेई इस परियोजना पर तेजिया कन्नै अमल करने पर जोर दित्ता तां जे इसी तौले मूर्त रूप दित्ता जाई सकै।

<><><><><><>

PM-MKB

प्रधानमंत्री नरेन्द्र मोदी होर कल ऐतवारें 25 मई गी आकाशवाणी पर प्रसारित होने आहले अपने महावार रेडियो कार्यक्रम “मन की बात” राएं देश विदेश च रोहने आहले लोकें कन्ने अपने विचार सांझे करडन। हर म्हीने दे अखीरले ऐतवार प्रसारित होने आहले इस कार्यक्रम दी एह 122मीं कड़ी होग। एह कार्यक्रम बडुलै 11 बजे आकाशवाणी ते दूरदर्शन दे समूलचे नेटवर्क पर प्रसारित कीता जाग। एहदे कन्नोकन्नी प्रधानमंत्री हुंदे दफ्तर, सूचना ते प्रसारण मंत्रालय ते आकाशवाणी समाचार ते डी.डी न्यूज दे यू-ट्यूब चैनलें पर बी मन की बात कार्यक्रम उपलब्ध होग। मन की बात दे तुरत मगरा एहदा डोगरी भाषा च अनुवाद प्रसारित कीता जाग। एहदा डोगरी अनुवाद तुस रातीं 8 बजे इक बारी परतियै आकाशवाणी जम्मू पर सुनी सकदे हो।

<><><><><><>

DGC-Kathua

गौरमेंट डिग्री कॉलेज कठुआ दे एनसीसी कैडेट मोहित कनाथिया नै 18 मई 2025 गी उच्ची प्हाड़ी किंगर माउंट एवरेस्ट उप्पर सफलतापूर्वक चढ़ाई करियै समूलचे जम्मू-कश्मीर गी फख्र मसूस कराया ऐ। NCC Everest Expedition 2025 लेई पूरे देश दे 10 नौजवानें गी चुनेआ गेदा हा जिंदे च मोहित जम्मू-कश्मीर दे इक्कले कैडेट हे। उनें साहस ते दलेरी दा प्रदर्शन करदे होई एह उपलब्धि हासल कीती। अप्रैल च रक्षा मंत्री राजनाथ सिंह होरें इस अभियान दी झंडी दस्सियै शुरूआत कीती ही। कॉलेज दे प्रिंसीपल प्रो. सीमा मीर होरें मोहित हुंदी इस शानदार उपलब्धि दी सराहना कीती। उनें एनसीसी अधिकारियें ते सखेत्रुएं दा बी इस ऐतिहासिक जित्त लेई सहयोग देने लेई धन्नवाद कीता।

<><><><><><>

Announcement

आकाशवाणी जम्मू दे क्षेत्रीय समाचार एकांश आसेआ कठुआ जिले लेई अंशकालिक संवाददाता यानि पीटीसी लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 बरें दे बश्कार ऐ ते ओहू कठुआ जिले दा रौहने आह्ला ऐ, इस लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 बरें दा तजुर्बा होना लोइचदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंधत लोइचदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोइचदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू पिन कोड 180001 उप्पर 15 जून 2025 थवां पैहले-पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>